



Na osnovu člana 22 Statuta Brčko distrikta BiH („Službeni glasnik Brčko distrikta Bosne i Hercegovine“ broj: 20/10 – prečišćeni tekst), Skupština Brčko distrikta BiH, na 56. redovnoj sjednici održanoj 14. marta 2024. godine, donosi

KODEKS PONAŠANJA POSLANIKA SKUPŠTINE BRČKO DISTRIKTA BOSNE I HERCEGOVINE

I. Uvodne odredbe

Član 1 (Predmet)

Ovim Kodeksom ponašanja poslanika Skupštine Brčko distrikta Bosne i Hercegovine (u daljnjem tekstu: Kodeks) uređuju se principi i pravila etičkog ponašanja poslanika Skupštine Brčko distrikta Bosne i Hercegovine (u daljnjem tekstu: Skupština), mjere za provođenje Kodeksa, nadležnost i postupak za utvrđivanje povreda i izricanje sankcija, povjerljivo savjetovanje, nadzor nad provođenjem Kodeksa, kao i druga pitanja od značaja za uređenje pitanja etičkog ponašanja i odgovornosti poslanika Skupštine.

Član 2 (Cilj)

(1) Ovim Kodeksom poslanici Skupštine promovišu principe profesionalnog i etičkog ponašanja u svom radu radi očuvanja i unapređenja integriteta i ugleda Skupštine kao i svakog poslanika pojedinačno, kao izabranih predstavnika svih građana u Brčko distriktu Bosne i Hercegovine (u daljnjem tekstu: Distrikt).

(2) Poslanici Skupštine obavezni su primjenjivati etičke principe i pravila ponašanja sadržane u ovom Kodeksu s ciljem da održe i pojačaju povjerenje građana i javnosti u integritet Skupštine i njenih zvaničnika, i svoj rad i postupanje usklađuju s istim, a u najboljem interesu svih stanovnika Distrikta.

Član 3 (Područje primjene)

(1) Ovaj Kodeks se odnosi na poslanike Skupštine kao predstavnike građana, izabrane na neposrednim i tajnim izborima.

(2) Principi i pravila ponašanja ustanovljeni ovim Kodeksom primjenjivat će se na sjednicama Skupštine, sjednicama komisija, međusobnoj komunikaciji, komunikaciji s predstavnicima drugih nivoa vlasti, komunikaciji s javnošću i svim javnim istupima, uključujući i istupe na društvenim mrežama i u izbornoj kampanji.

Član 4 (Rodna ravnopravnost)

Termini i izrazi upotrijebljeni u Kodeksu navode se u jednom gramatičkom rodu, i bez diskriminacije se odnose i na muškarce i na žene.

Član 5
(Upoznavanje sa sadržajem Kodeksa)

Prilikom stupanja na dužnost poslanika, šef Stručne službe Skupštine osigurava da se svakom poslaniku dostavi odštampan primjerak Kodeksa, čime se smatra da je upoznat sa sadržajem istog.

Član 6
(Značenje termina i izraza)

U smislu ovog Kodeksa, pojedini upotrijebljeni termini i izrazi imaju sljedeće značenje:

- a) "poslanik u Skupštini" je predstavnik građana Distrikta izabran na neposrednim izborima u skladu s Izbornim zakonom Bosne i Hercegovine;
- b) "sukob interesa" – postoji kada poslanik ima privatni interes koji utiče, može uticati ili se stvara utisak da utiče na obavljanje javne funkcije;
- c) „bliski srodnik“ je bračni i vanbračni drug, usvojlac, usvojenik, dijete, majka i otac, odnosno lice prema kome poslanik ima zakonsku obavezu izdržavanja;
- d) "nepotizam" – favorizovanje osoba koje su u porodičnoj vezi s poslanikom radi ostvarivanja kakve koristi, zaposlenja i/ili položaja za takve osobe;
- e) "kronizam" – favorizovanje osoba koje su u prijateljskim, drugarskim, političkim, kolegijalnim i drugim sličnim odnosima s poslanikom radi dodjele poslova, postavljanja na određene pozicije i/ili ostvarivanja neke druge koristi ili interesa poslanika i/ili tih osoba;
- f) "povezano lice" je član uže porodice, srodnik u pravoj liniji, srodnik u pobočnoj liniji do trećeg stepena, srodnik po tazbini do drugog stepena, dijete bračnog druga ili bilo koje pravno ili fizičko lice koje je s poslanikom u ličnoj, političkoj, ekonomskoj ili drugoj vezi koja utiče ili bi mogla uticati na objektivnost i nepristrasnost u radu poslanika.

II. Osnovni etički principi

Član 7
(Poštovanje zakona i drugih propisa)

(1) Poslanici Skupštine u svom radu su dužni da se pridržavaju zakona i drugih propisa, uključujući i principe i pravila etičkog ponašanja sadržanih u ovom Kodeksu, dužni su primjenjivati standarde, smjernice i pravila kojima je uređeno obavljanje dužnosti izabranih predstavnika Skupštine.

(2) Poslanici su dužni svoje aktivnosti preduzimati radi ostvarivanja najboljeg javnog interesa.

(3) Nijednu svoju odluku poslanici neće donijeti niti će glasati, odnosno ostati suzdržani bez odgovarajućeg obrazloženja, niti prećutati da javno iznesu informaciju ili stav ukoliko im je poznato da određeni akt koji treba da se usvoji nije u skladu sa zakonom ili opštim aktima Brčko distrikta BiH ili smatraju da nije poštovana procedura njegovog donošenja.

Član 8
(Očuvanje integriteta)

(1) Poslanici Skupštine su dužni da u svom djelovanju, prema svojim najboljim znanjima i sposobnostima, uvijek samostalno donose svoje odluke za koje su nadležni i odgovorni, uvijek imajući u vidu najbolji interes svih građana.

(2) Poslanici Skupštine ni u kom slučaju neće prihvatati finansijske ili druge obaveze ili očekivati bilo kakve materijalne i slične privatne koristi od pojedinaca ili organizacija radi opredjeljivanja u pogledu odlučivanja u Skupštini.

Član 9 (Nediskriminacija)

(1) Poslanicima Skupštine u obavljanju dužnosti je zabranjeno postupanje s bilo kakvim oblicima predrasuda ili diskriminacije, a naročito po osnovu rase, vjere, spola, nacionalne ili etničke pripadnosti, političkog opredjeljenja, starosne dobi, bračnog statusa, seksualne orijentacije, socijalno-imovinskog statusa, kao i svake druge različitosti.

(2) Poslanicima Skupštine je zabranjeno favorizovanje bilo koje osobe ili grupe osoba po bilo kom osnovu, a posebno po osnovu veza koje čine nepotizam i kronizam.

Član 10 (Odgovornost i javni interes)

(1) Poslanici Skupštine svoju dužnost obavljaju odgovorno, profesionalno i savjesno, vršeći je isključivo u javnom interesu.

(2) Poslanici Skupštine neće izbjegavati da budu podvrgnuti svakoj kontroli koja je primjerena njihovoj javnoj funkciji.

(3) Poslanici Skupštine su dužni saradivati u postupku utvrđenom ovim kodeksom i prihvatiti konačne odluke nadležnih tijela, u slučaju utvrđene povrede odredaba ovog kodeksa.

(4) U vršenju javne funkcije, poslanici su dužni osigurati da nijedan lični ili privatni interes, interes povezanih lica, grupa, organizacija kao i političkih stranaka i drugih, na bilo koji način povezanih subjekata, nema prioritet nad javnim interesom.

Član 11 (Ravnopravnost spolova)

Poslanici Skupštine imaju obavezu da poštuju relevantne propise koji se odnose na ravnopravnost spolova i jednak tretman muškaraca i žena, te da daju doprinos osiguravanju i jačanju rodne osjetljivosti Skupštine i njenog rada.

Član 12 (Javnost rada)

(1) Poslanici Skupštine su dužni da javno iznesu razloge za svoje postupke i odluke koje donose.

(2) Poslanici imaju pravo i dužnost uskratiti podatke i informacije u skladu s ograničenjima propisanim zakonom.

(3) Poslanici Skupštine su dužni izvještavati javnost o svom radu u skladu s pravilima o radu Skupštine te neće izbjegavati da pružaju informacije kako o svom ličnom radu tako i o radu Skupštine, bilo na poziv ili zahtjev javnosti ili na vlastitu inicijativu.

Član 13 (Uzajamno poštovanje i komunikacija)

(1) U međusobnoj komunikaciji i komunikaciji s javnošću poslanici Skupštine u svakom slučaju istupaju s uvažavanjem i poštovanjem, njeguju kulturu dijaloga i argumentovanu razmjenu mišljenja i ideja.

(2) Poslanici Skupštine neće koristiti neprimjerene izraze ili gestikulaciju kojima se može narušiti lični ugled drugih poslanika kao i ugled Skupštine.

III. Pravila ponašanja i obaveze poslanika

Član 14

(Zabrana korupcije i drugih oblika zloupotrebe javne funkcije)

(1) Poslanici Skupštine ni u kom slučaju neće preduzimati bilo kakve aktivnosti koje bi se mogle okarakterisati kao koruptivne aktivnosti i zloupotreba povjerenih javnih ovlaštenja, a u svrhu sticanja lične koristi kao i koristi bliskih srodnika i drugih povezanih lica.

(2) Poslanicima je naročito zabranjeno:

a) primanje ili zahtijevanje bilo kakve finansijske ili druge koristi u vezi s obavljanjem povjerene javne dužnosti;

b) korištenje službenih ovlaštenja i ugleda radi sticanja kakve privatne koristi ili koristi povezanih lica;

c) posebno zahtijevanje ili primanje finansijske ili druge koristi, uključujući i obećanje obezbjeđenja sopstvene buduće pozicije, kao naknade za donošenje odluke, odnosno glasanje koje pogoduje interesima određenog lica, grupe ili organizacije;

d) primanje ili zahtijevanje nagrade za uticaj na dodjelu budžetskih sredstava (u postupku javne nabavke, finansiranja i sufinansiranja projekata od javnog interesa, dodjele donacija, jednokratnih pomoći i tome slično);

e) uticati na zapošljavanje kako u javnom tako i u privatnom sektoru, sa i bez obećanja protivčinidbe;

f) davanje ili korištenje povlaštenih informacija do kojih je poslanik došao u obavljanju svoje funkcije radi sticanja finansijske ili neke druge koristi za sebe ili za povezana lica.

Član 15

(Sprečavanje sukoba interesa)

(1) Na poslanike Skupštine primjenjuje se Zakon o sprečavanju sukoba interesa u institucijama Brčko distrikta Bosne i Hercegovine.

(2) U upravljanju sukobom između privatnog i javnog interesa, poslanici su dužni da:

a) izbjegavaju situacije koje ih mogu dovesti do sukoba interesa;

b) objelodane privatni interes koji ih dovodi do sukoba s javnim interesom u slučaju da sukob interesa nije moguće izbjeći te se suzdrže od odlučivanja o konkretnom pitanju;

c) se izuzmu iz svih postupaka u kojem učestvuje u okviru svoje javne dužnosti kao i postupaka odlučivanja, odnosno glasanja, u slučaju postojanja sukoba interesa;

d) traže tumačenje od Komisije za odlučivanje o sukobu interesa u slučaju dileme da li se u konkretnom slučaju radi o sukobu interesa;

e) se povinuju konačnim odlukama Komisije za odlučivanje o sukobu interesa.

(3) Poslanici Skupštine su dužni, prije ili u toku rasprave i odlučivanja (ad hoc prijavljivanje), prijaviti svaki slučaj sukoba interesa, potencijalnog i/ili prividnog sukoba interesa, ukoliko se razmatra određeni akt koji treba da bude usvojen i po kome bi oni, ili njegovi bliski srodnici, povezana lica ili pravni subjekt u kome imaju finansijski ili drugi interes, mogli, direktno ili indirektno ostvariti kakvu korist i/ili privilegiju, a prilikom odlučivanja će se uzdržati od izjašnjavanja.

(4) Poslanici Skupštine su dužni da prijave sve okolnosti koje su direktno ili indirektno povezane sa njihovim privatnim interesom, uključujući i privatni interes bliskih srodnika i povezanih lica kao i u situacijama koje su propisane zakonom, neovisno o budućem predmetu odlučivanja.

Član 16 (Zabrana obavljanja nespojivih funkcija)

Poslanici Skupštine su dužni da se pridržavaju zabrane obavljanja nespojivih funkcija, kako to predviđaju Statut Brčko distrikta Bosne i Hercegovine i Zakon o sprečavanju sukoba interesa u institucijama Brčko distrikta Bosne i Hercegovine.

Član 17 (Finansijska disciplina i korištenje povjerenih sredstava)

(1) U vršenju povjerene javne funkcije, poslanici Skupštine su dužni poštovati pravila budžetske i finansijske discipline te pravilnog upravljanja javnim sredstvima.

(2) Poslanici su dužni da savjesno, efikasno i ekonomično raspolazu finansijskim i materijalnim sredstvima koja su im povjerena i spriječiti njihovo nezakonito korištenje.

(3) Poslanici Skupštine neće koristiti javna sredstva u privatne svrhe, niti omogućavati drugim licima da ta sredstva koriste u privatne svrhe.

(4) Poslanici Skupštine neće tražiti niti omogućavati korištenje javnih sredstava kao što su korištenje službenih prostorija, korištenje usluga državnih službenika kao i bilo kojeg drugog javnog resursa za potrebe političkih stranaka odnosno za izbornu kampanju i druge slične svrhe.

Član 18 (Primanje poklona)

(1) Poslanicama Skupštine nije dozvoljeno tražiti ili primiti poklon, bilo neposredno ili putem drugih lica koja budu nastupala u njihovo ime, nezavisno od toga da li se od njih očekuje protivusluga ili ne.

(2) U situaciji da prime poklon, poslanici Skupštine su dužni postupiti u skladu sa Zakonom o sprečavanju sukoba interesa u institucijama Brčko distrikta Bosne i Hercegovine.

Član 19 (Obaveza informisanja javnosti i saradnja s medijima)

(1) U svom radu poslanici Skupštine su dužni da otvoreno, potpuno i odgovorno informišu javnost o radu Skupštine i skupštinskih komisija čiji su članovi, kao i o svom ličnom radu i aktivno djeluju u pravcu unapređenja transparentnosti rada Skupštine. Ovo uključuje i davanje informacija javnosti o procesu donošenja i sadržaju usvojenih odluka, kao i rezultate konsultacija i prihvaćene stavove i prijedloge pojedinaca i organizacija koje su konsultovane.

(2) Poslanici Skupštine posebnu pažnju posvećuju saradnji s medijima u cilju informisanja javnosti o svim pitanjima iz njihovog djelokruga rada, osim o pitanjima koja se, u skladu sa zakonom, smatraju povjerljivim kao i o pitanjima koja se odnose na njihov privatni život i privatni život drugih lica te kao takva nisu relevantna za njihove konkretne obaveze i dužnosti.

(3) Neće se smatrati pitanjima iz privatnog života pitanja koja se odnose na vrstu povezanosti između poslanika i povezanih lica te pitanja vezana za njihov finansijski i drugi interes u konkretnim stvarima.

(4) U javnim istupima i ophođenju s medijima, poslanici su dužni voditi računa o ličnom ugledu, ugledu drugih nosilaca javne funkcije kao i ugledu Skupštine.

Član 20

(Poštovanje pravila o radu Skupštine)

(1) Poslanici Skupštine svoje dužnosti obavljaju savjesno i odgovorno, u skladu s propisima, profesionalnim i etičkim principima i pravilima o radu.

(2) Poštujući obaveze poslanika, da su dužni prisustvovati sjednicama Skupštine i skupštinskih komisija čiji su članovi, a uvažavajući jedni druge, neće bez opravdanog razloga napuštati zasjedanje prije završetka, a ni u toku trajanja zasjedanja, a da prije toga ne saopšte javno ili predsjedniku Skupštine odnosno predsjedavajućem komisije razlog privremenog ili potpunog napuštanja zasjedanja.

(3) Ako su opravdanim razlogom spriječeni da prisustvuju sastancima ili sjednicama na koje su uredno i blagovremeno pozvani, poslanici su dužni postupiti na način propisan Poslovníkom o radu Skupštine Brčko distrikta Bosne i Hercegovine (u daljnjem tekstu: Poslovník).

(4) Poslanici Skupštine su dužni, poštujući odredbe Poslovníka, striktno se pridržavati pravila o održavanju reda na sjednicama Skupštine i skupštinskih komisija čiji su članovi, a naročito:

- a) poštovati tok rasprave i raspravljati samo o temi koja je na dnevnom redu zasjedanja;
- b) govoriti samo po odobrenju predsjedavajućeg sjednice;
- c) neće koristiti neadekvatan rječnik koji vrijeđa dostojanstvo drugih, podstiče na mržnju, nasilje i netoleranciju bilo koje vrste;
- d) poštovati pravila kućnog reda i pravila opšte kulture.

(5) Poslanici Skupštine neće bez opravdanog razloga izostajati s javnih manifestacija ili javnih skupova koji se organizuju na području Distrikta kao i u drugim prilikama, a na koje događaje su uredno i blagovremeno pozvani ili delegirani u svojstvu poslanika Skupštine.

Član 21

(Poštovanje zaposlenih)

(1) U obavljanju svojih dužnosti, poslanici Skupštine su dužni pokazati puno poštovanje prema svim zaposlenima u Skupštini, bez predrasuda zasnovanih na političkoj opredijeljenosti, nacionalnoj, rasnoj ili vjerskoj pripadnosti, spolu ili bilo kom drugom statusu zaposlenog.

(2) Poslanici Skupštine neće tražiti niti zahtijevati od zaposlenih da preduzmu ili propuste neku radnju ili mjeru kako bi stekli direktnu ili indirektnu korist.

Član 22

(Obaveza edukacije i usavršavanja)

U cilju što uspješnijeg obavljanja dužnosti, poslanici Skupštine usavršavaju svoja znanja i sposobnosti, kako samostalnim aktivnostima tako i prisustvovanjem na seminarima, savjetovanjima i drugim oblicima edukacije.

Član 23

(Zabrana seksualnog uznemiravanja)

(1) Zabranjen je svaki oblik seksualnog uznemiravanja.

(2) Seksualno uznemiravanje je svaki neželjeni oblik verbalnog, neverbalnog ili fizičkog ponašanja spolne prirode kojim se želi povrijediti dostojanstvo osobe ili grupe osoba, ili kojim se postiže takav učinak, naročito kad to ponašanje stvara zastrašujuće, neprijateljsko, degradirajuće, ponižavajuće ili uvredljivo okruženje.

(3) Pod neželjenim oblicima verbalnog ponašanja, u smislu stava 2 ovog člana, smatraju se:

- a) upućivanje verbalnih i fizičkih prijedloga seksualne naravi drugoj osobi;
- b) zahtijevanje neželjenog fizičkog kontakta;
- c) iznošenje šala ili aluzija koje su spolne prirode, uključujući opaske u vezi sa spolom i seksualnom orijentacijom;
- d) izrugivanje i ismijavanje na spolnoj osnovi;
- f) pisanje seksualno eksplicitnih ili sugestivnih poruka ili pisama;
- g) neželjeni pozivi na sastanke, flertovanje ili zahtijevanje spolnog odnosa ili seksualnih usluga;
- h) širenje glasina seksualne naravi;
- i) prijetnje upućene drugoj osobi koja odbija udovoljiti seksualnim ponudama.

(4) Neželjenim oblicima neverbalnog ponašanja u smislu stava 2 ovog člana smatraju se: gestikulacije, znakovi i insinuacije koje upućuju na imitaciju spolnog odnosa.

(5) Zabrana iz stava 2 ovog člana odnosi se i na ponašanja koja nisu upućena direktno licu na koje se odnose.

Član 24 (Kodeks oblačenja)

Poslanici Skupštine su dužni da budu prikladno i uredno obučeni i obuveni, primjereno funkciji poslanika i da svojim načinom oblačenja u vršenju dužnosti poslanika ne narušavaju ugled Skupštine.

IV. Primjena Kodeksa

Član 25 (Komisija za sprovođenje Kodeksa ponašanja poslanika u Skupštini)

(1) Za primjenu ovog Kodeksa zadužena je Komisija za sprovođenje Kodeksa ponašanja poslanika u Skupštini (u daljnjem tekstu: Komisija).

(2) Komisija ima devet članova od kojih su šest članova iz reda poslanika Skupštine a tri člana su predstavnici građana Distrikta, koji su ugledni pojedinci s integritetom.

(3) Najmanje dva člana Komisije koji se biraju iz reda poslanika u Skupštini mora biti iz opozicije.

(4) Prilikom izbora članova Komisije vodi se računa o ravnomjernoj zastupljenosti oba spola.

(5) U sastav Komisije, putem javnog konkursa, biraju se tri člana koji su predstavnici građana. Kriterije i postupak za izbor propisuje Komisija za izbor i imenovanje i mandatno-imunitetska komisija koji će uključivati: dokaz o nevođenju krivičnog postupka, dokaz o nepostojanju političkog angažmana, najmanje deset godina iskustva u obavljanju poslova odabrane profesije, nesumnjiv ugled u društvu koji se dokazuje odgovarajućim referencama, poželjan društveno-koristan rad, kao i eventualno javno zapažen angažman na pitanjima od interesa javnosti.

(6) Predsjedavajućeg Komisije imenuje Skupština iz reda poslanika.

(7) Članovi Komisije iz reda građana se biraju na mandatni period od 4 (četiri) godine

i mandat ovih članova Komisije nije vezan za mandat Skupštine.

(8) Za svoj rad Komisija je odgovorna Skupštini.

(9) Članovi Komisije će o svakom pojedinačnom pitanju dati mišljenje koje se uzima u obzir.

(10) Mišljenje iz stava 9 ovog člana, o pojedinačnim pitanjima razmatranim na sjednici Komisije će biti dato na zapisnik i ne zahtijeva naročitu formu.

(11) Članovi Komisije iz reda građana za svoj rad imaju pravo na naknadu čija visina se utvrđuje posebnom odlukom Skupštine.

Član 26 (Djelokrug rada Komisije)

(1) Komisija obavlja sljedeće poslove:

a) prati primjenu Kodeksa i daje Skupštini prijedloge i mišljenja u pogledu unapređenja njegovog sadržaja;

b) prati rad poslanika Skupštine i ukazuje na slučajeve ili pojave neprimjerenog ponašanja poslanika i povrede Kodeksa;

c) prima prijave o povredi Kodeksa;

d) provodi postupak po prijavi, a radi utvrđivanja činjenica i odgovornosti prijavljenog poslanika;

e) odlučuje o izricanju odgovarajuće sankcije, u slučajevima utvrđivanja postojanja odgovornosti za povredu ovog Kodeksa;

f) na upit poslanika daje mišljenje o tome da li određeno ponašanje ili konkretna situacija može da predstavlja povredu odredaba ovog Kodeksa;

g) organizuje povjerljivo savjetovanje poslanika o primjeni odredaba ovog kodeksa ili drugim pitanjima iz oblasti integriteta;

h) po potrebi i u skladu s posebnim planovima, organizuje prezentaciju i obuke o primjeni Kodeksa;

i) saraduje s drugim organima i tijelima, a posebno s organima koji se bave pitanjima otkrivanja i sprečavanja korupcije i sprečavanja sukoba interesa;

j) podnosi Skupštini polugodišnji izvještaj o svom radu ili o radu u kraćim periodima po posebnom zahtjevu Skupštine;

k) na osnovu praćenja primjene Kodeksa, sačinjava analizu poštovanja Kodeksa od strane poslanika koju dostavlja Skupštini i daje preporuke za unapređenja;

l) obavještava javnost o svom radu;

lj) donosi poslovnik o radu, u skladu s ovim kodeksom i poslovníkom;

m) obezbjeđuje vođenje zapisnika o svom radu; i

n) vodi registar odluka po prijavama povreda ovog kodeksa.

(2) Članovi Komisije iz reda građana učestvuju u provedbi svih poslova iz stava 1 ovog člana, dok u realizaciji poslova iz stava 1 tačke e) učestvuju davanjem mišljenja.

(3) Stručne, administrativne i tehničke poslove za potrebe Komisije obavlja Stručna služba Skupštine.

Član 27 (Predsjedavajući Komisije)

Predsjedavajući Komisije saziva i predsjedava sjednicama Komisije, prima prijave o povredi Kodeksa i drugu dokumentaciju dostavljenu uz prijavu, organizuje rad Komisije,

ostvaruje neposrednu saradnju s nadležnim organima i tijelima, daje informacije javnosti o radu Komisije, potpisuje akte koje donosi Komisija i vrši druge poslove u skladu s ovim Kodeksom, Poslovníkom i aktima Komisije.

Član 28

(Prestanak mandata i izuzeće člana Komisije)

(1) Predsjedavajući i član Komisije je dužan da povjerene poslove izvršava savjesno i odgovorno i u skladu s najvišim etičkim standardima.

(2) Predsjedavajući i član Komisije može biti razriješen dužnosti u Komisiji prije vremena na koje je izabran na lični zahtjev ili na prijedlog Komisije u slučaju da svoju dužnost ne vrši u skladu s povjerenim mandatom.

(3) Prijedlog za razrješenje predsjedavajućeg i člana Komisije, pored drugog člana ili članova Komisije može podnijeti predsjednik Skupštine ili najmanje pet poslanika u Skupštini.

(4) Član Komisije je dužan da se u pisanoj formi izuzme iz razmatranja i odlučivanja u postupku po prijavi ukoliko se prijava odnosi na njega ili sa njim povezano lice ili ukoliko je sam podnosilac prijave

(5) Izuzeće člana Komisije, u smislu stava 4 ovog člana, konstatuje Komisija na svojoj sjednici i izuzeti član ne može učestvovati u daljnjem radu Komisije u konkretnom postupku.

Član 29

(Način odlučivanja)

(1) Komisija radi u sjednicama koje se održavaju najmanje jednom mjesečno.

(2) Kvorum za rad Komisije je pet članova Komisije, od kojih najmanje jedan član mora biti iz reda građana.

(3) Izuzetno od propisanog odredbama člana 44 Poslovníka, Komisija donosi odluke glasovima najmanje četiri člana, glasanjem na nejavnoj sjednici.

(4) Na kvorum i način odlučivanja na sjednici Komisije utvrđen u stavu 2 ovog člana ne utiče eventualno izuzeće predsjedavajućeg ili člana Komisije.

V. Sankcije u slučaju povrede Kodeksa

Član 30

(Vrste sankcija)

(1) U slučaju povrede Kodeksa, zavisno od okolnosti, Komisija može izreći:

a) opomenu,

b) javnu opomenu i

c) novčanu kaznu.

(2) "Opomena" se izriče za lakše povrede odredbi Kodeksa i može je izreći Komisija nakon sprovedenog postupka u skladu s ovim kodeksom, donošenjem odluke na nejavnoj sjednici.

(3) "Javna opomena" se izriče za teže povrede odredbi Kodeksa, a izriče je Komisija nakon provedenog postupka po prijavi.

(4) "Novčana kazna" se izriče za teže i ozbiljne povrede odredbi Kodeksa i može iznositi od 20% do 50% od novčane naknade u bilo kojoj formi koja pripada poslaniku za njegov rad u Skupštini, u periodu od jednog do šest mjeseci od dana konačnosti odluke.

Član 31 Izvršenje sankcija

(1) Opomena se izvršava dostavljanjem odgovornom poslaniku pisanog otpravka konačne odluke kojom je izrečena ta sankcija.

(2) Javna opomena se izvršava objavljivanjem konačne odluke u roku od tri dana od dana konačnosti odluke o izricanju ove sankcije na zvaničnoj internet stranici Skupštine, na period od šest mjeseci od dana objavljivanja, a odluka se objavljuje i u Službenom glasniku Brčko distrikta Bosne i Hercegovine.

(3) Novčana kazna se izvršava umanjnjem poslaničke naknade, u skladu s konačnom odlukom.

(4) Odluka o izrečenoj novčanoj kazni za povredu odredbi Kodeksa objavit će se na zvaničnoj internet stranici Skupštine, na period od šest mjeseci od dana objavljivanja, kao i u Službenom glasniku Brčko distrikta BiH.

VI. Postupak po prijavama o povredi odredaba Kodeksa

Član 32 (Podnošenje prijave)

(1) Pravo na podnošenje prijave za povredu ovog kodeksa imaju poslanici u Skupštini i svako drugo fizičko ili pravno lice.

(2) Prijava se podnosi Komisiji i može se dostaviti neposredno putem pisarnice u Stručnoj službi Skupštine, putem pošte ili elektronskim putem.

(3) Prijava mora sadržavati podatke o podnosiocu prijave (ime i prezime, adresa), ime i prezime poslanika protiv koga se podnosi prijava i razloge prijave, priložene dokaze ili upućivanje na instituciju kod koje se nalaze dokazi ako je to primjenjivo, kao i datum i potpis podnosioca prijave.

(4) Podnosilac prijave može zahtijevati da se sa njegovom prijavom postupa na povjerljiv način, a što uključuje zabranu objavljivanja njegovog identiteta.

(5) U slučaju iz stava 4 ovog člana, Komisija je dužna u nastavku postupka zaštititi identitet podnosioca prijave.

Član 33 (Rokovi)

(1) Prijava za povredu ovog kodeksa može se podnijeti najkasnije u roku od tri mjeseca od dana učinjene povrede.

(2) Podnesenu prijavu Komisija je dužna odmah uzeti u rad i donijeti odluku najkasnije u roku od tri mjeseca od dana prijave.

(3) Poslanik koji je prijavljen za povredu Kodeksa se, po pozivu Komisije, izjašnjava u roku od sedam dana od dana kada ga je Komisija pozvala na izjašnjenje.

(4) Podnošenje prijave zastarijeva protekom roka od tri mjeseca od dana učinjene povrede Kodeksa, a u roku od šest mjeseci od dana učinjene povrede zastarijeva vođenje postupka po prijavi.

(5) U slučaju da Komisija ne donese odluku u roku predviđenom odredbama stava 2 ovog člana, dužna je posebno obrazložiti razloge u izvještajima koje priprema za Skupštinu.

Član 34 (Postupak po prijavi)

(1) Nakon prijema prijave o povredi Kodeksa, predsjedavajući saziva sjednicu Komisije na kojoj se razmatra uočena povreda odnosno razmatraju navodi prijave njenim čitanjem i razmatranjem priloženih dokaza, ako postoje.

(2) Ukoliko je prijava anonimna ili je podnesena nakon proteka roka za podnošenje ili u slučaju nekog drugog formalnog nedostatka, Komisija će istu odbaciti kao neurednu, odnosno neblagovremenu.

(3) Ukoliko je prijava uredna i blagovremena, Komisija poziva na izjašnjenje poslanika koji je prijavljen za povredu Kodeksa, uz ostavljanje mogućnosti da izjašnjenje dostavi Komisiji pisanim putem ili da pristupi određenog datuma pred Komisiju radi davanja izjašnjenja. Komisija upozorava poslanika da će se postupak nastaviti i u slučaju da poslanik ne postupi po pozivu Komisije.

(4) Ukoliko poslanik koji je prijavljen za povredu Kodeksa ne postupi po pozivu Komisije na način propisan u stavu 3 ovog člana, Komisija nastavlja postupak izvođenjem drugih dokaza, uz obavještenje poslaniku o datumu održavanja rasprave ukoliko se rasprava zakazuje radi saslušanja svjedoka. Komisija postupak nastavlja i u slučaju da se poslanik ne odazove pozivu za učešće u raspravi.

(5) Ukoliko se u prijavi ili izjašnjenju poslanika navode određeni dokazi (uvid u dokumentaciju, preslušavanje nosača zvuka i/ili videozapisa) Komisija preuzima mjere da se ti dokazi obezbijede.

(6) U slučaju izvođenja dokaza saslušanjem svjedoka, Komisija upućuje poziv svjedoku uz naznačenje datuma, sata i mjesta gdje će se održati sjednica Komisije radi davanja izjave svjedoka.

(7) Ako nema predloženih svjedoka, predsjedavajući Komisije zakazuje sjednicu Komisije na kojoj se detaljno razmatra sadržaj prijave, izjašnjenje poslanika i dokazi.

(8) U pogledu komunikacije Komisije s drugim učesnicima u postupku, primjenjuju se odredbe Zakona o upravnom postupku Brčko distrikta Bosne i Hercegovine u dijelu koji reguliše dostavljanja pismena, računanje rokova i punomoćnike stranaka.

Član 35 (Obavještanje nadležnih organa)

(1) U slučaju kada Komisija postupajući po prijavi utvrdi da u konkretnom slučaju postoje indicije o učinjenom krivičnom djelu, prekršaju ili nekoj drugoj povredi propisa, a za utvrđivanje odgovornosti je nadležan drugi organ, Komisija je dužna da bez odlaganja proslijedi prijavu tom nadležnom organu.

(2) Postupanje Komisije na način opisan u stavu 1 ovog člana ne sprečava Komisiju da provede postupak saglasno Kodeksu te ukoliko utvrdi povredu određaba istog izrekne odgovarajuću sankciju.

Član 36 (Odluke Komisije)

(1) Nakon razmatranja provedenih dokaza, pojedinačno i u međusobnoj povezanosti, te potpuno utvrđenog činjeničnog stanja, Komisija odlučuje o postojanju ili nepostojanju povrede Kodeksa od strane poslanika.

(2) Ukoliko Komisija smatra da nema dovoljno dokaza ili da utvrđeno činjenično stanje pokazuje da ne postoji povreda Kodeksa, donijet će odluku o obustavi postupka odnosno o

odbijanju prijave.

(3) Članovi Komisije iz reda građana učestvuju u postupku iz stava 1 ovog člana.

(4) Komisija neće postupiti saglasno odredbama stava 2 ovog člana, u slučaju negativnog mišljenja sva tri člana Komisije iz reda građana, već će konkretno pitanje dodatno razmotriti.

(5) Ukoliko Komisija smatra da utvrđeno činjenično stanje dokazuje postojanje odgovornosti prijavljenog poslanika, donosi odluku kojom se utvrđuje povreda Kodeksa i izriče sankcija, u zavisnosti od težine povrede Kodeksa.

Član 37

(Sadržaj odluke Komisije)

(1) Odluka Komisije sadrži uvod, dispozitiv i obrazloženje.

(2) Uvod odluke sadrži pravni osnov za donošenje odluke, oznaku predmeta odluke, ime i prezime prijavioca, osim u slučaju iz člana 32 stava 5 Kodeksa, ime i prezime poslanika i datum donošenja odluke Komisije.

(3) Dispozitivom odluke se rješava konkretni slučaj i istom se prijava odbija kao neosnovana ili se obustavlja postupak ili se utvrđuje postojanje povrede konkretne odredbe ili odredaba Kodeksa od strane poslanika, te izriče sankcija.

(4) U obrazloženju se navode detalji postupka, izvedeni dokazi i utvrđeno činjenično stanje kao i pravni osnov odluke.

(5) Odluke i druge akte Komisije potpisuje predsjedavajući Komisije i ovjeravaju se pečatom Stručne službe Skupštine.

Član 38

(Žalba na odluku)

(1) Protiv odluke Komisije poslanik ima pravo žalbe Skupštini u roku od 15 dana od dana dostavljanja odluke.

(2) O žalbi iz stava 1 ovog člana odlučuje Skupština u roku od 30 dana od dana podnošenja žalbe, na nejavnoj sjednici.

(3) Sjednici Skupštine na kojoj se odlučuje o žalbi, ne prisustvuju poslanici imenovani u Komisiju.

(4) Prilikom odlučivanja o žalbi Skupština može donijeti odluku o:

a) odbacivanju neblagovremene žalbe,

b) odbijanju žalbe kao neosnovane,

c) djelimičnom usvajanju žalbe uz izmjenu izrečene sankcije, ili

d) usvajanju žalbe i poništenju odluke Komisije.

(5) Odluka Skupštine iz stava 3 ovog člana je konačna i protiv nje se može pokrenuti upravni spor.

Član 39

(Zapisnici)

(1) O radu Komisije vodi se zapisnik koji Komisija usvaja na prvoj narednoj sjednici za prethodnu sjednicu.

(2) O vođenju i izradi zapisnika o radu Komisije i pripremi nacрта odluka Komisije, saglasno sadržaju zapisnika, zadužena je Stručna služba Skupštine.

Član 40

(Registar odluka po prijavama povreda Kodeksa)

(1) Komisija ustanovljava i u kontinuitetu vodi registar odluka po prijavama povreda odredaba ovog Kodeksa.

(2) Registar iz stava 1 ovog člana obavezno sadrži redni broj, ime i prezime prijavljenog poslanika, odredbu Kodeksa na koju se odnosi prijava, podatke o prijaviocu osim u slučaju iz člana 32 stava 5 Kodeksa, te odluke i mjere koje je preduzela Komisija po podnesenoj prijavi.

(3) U prilogu registra su zapisnici i druga dokumentacija nastala u radu Komisije.

(4) Odluke Komisije su dostupne javnosti.

Član 41

(Obavještanje podnosioca prijave)

(1) Predsjedavajući Komisije u roku od osam dana od dana donošenja odluke Komisije po podnesenoj prijavi, obavještava podnosioca prijave o postupku koji je preduzela i o odlukama koje je Komisija donijela.

(2) Ukoliko je bila uložena žalba na odluku Komisije, predsjedavajući Komisije u roku od osam dana od dana donošenja odluke po žalbi obavještava podnosioca prijave.

VII. Povjerljivo savjetovanje

Član 42

(Savjetodavna uloga Komisije)

(1) U okviru svog djelokruga rada, Komisija savjetuje poslanike u slučaju nedoumica u pogledu primjene pojedinih odredaba ovog kodeksa i o drugim pitanjima koja se odnose na etično postupanje poslanika.

(2) Komisija iz reda svojih članova određuje jednog ili više članova, koji su predstavnici građana, a koji će vršiti poslove povjerljivog savjetovanja (u daljnjem tekstu: savjetnik).

(3) Povjerljivo savjetovanje se obavlja samo u prisustvu poslanika koji traži savjet i savjetnika.

(4) Pravilo povjerljivosti podrazumijeva obavezu savjetnika da kao tajnu čuva informacije koje mu je poslanik saopštio.

Član 43

(Pisani otporak mišljenja)

Ukoliko se poslanik obrati Komisiji sa zahtjevom za davanje pisanog mišljenja ili savjeta o određenom pitanju koje je regulisano ovim kodeksom, o takvom zahtjevu će se izjasniti Komisija i svoje mišljenje dostaviti podnosiocu zahtjeva u roku od 15 dana od dana podnošenja zahtjeva.

VIII. Obuka o primjeni Kodeksa

Član 44

(Plan edukacije)

(1) Na prijedlog Komisije, Skupština na početku kalendarske godine, usvaja godišnji plan edukacije poslanika iz oblasti etike, integriteta, sukoba interesa kao i primjene ovog kodeksa.

(2) Plan edukacija obavezno sadrži naziv tema koje će biti predmet edukacije poslanika i vrijeme održavanja obuke.

(3) O izvršavanju plana edukacije poslanika stara se predsjednik Skupštine i predsjedavajući Komisije.

Član 45 (Izrada publikacija)

(1) U cilju obezbjeđenja efikasnije primjene i veće dostupnosti sadržaja ovog kodeksa, kako poslanicima tako i široj javnosti, izradit će se posebna publikacija u formi vodiča za primjenu ovog kodeksa.

(2) Pripremu i izradu vodiča iz stava 1 ovog člana organizuje i obezbjeđuje Stručna služba Skupštine.

(3) Vodič za primjenu Kodeksa izradit će se i publikovati u roku od šest mjeseci od dana donošenja ovog Kodeksa.

IX. Nadzor nad primjenom Kodeksa

Član 46 (Nadležnost i predmet nadzora)

(1) Nadzor nad primjenom ovog kodeksa vrši Skupština neposredno i Komisija za borbu protiv korupcije.

(2) Nadzor iz stava 1 ovog člana obuhvata nadzor nad radom Komisije, razmatranje i usvajanje polugodišnjeg izvještaja o radu Komisije i druga relevantna pitanja primjene ovog kodeksa.

(3) Rezultat vršenja nadzora nad primjenom ovog kodeksa može biti ocjena uspješnosti njegove primjene, skretanje pažnje na određene tendencije ili pojave od značaja za etično ponašanje poslanika, uticaj javnosti te predlaganje i usvajanje određenih mjera za unapređenje odredaba Kodeksa i etičnog ponašanja poslanika.

Član 47 (Izvještaj o radu Komisije)

(1) Komisija priprema i Skupštini podnosi polugodišnji i godišnji izvještaj o radu do kraja jula za protekli šestomjesečni period odnosno do kraja januara tekuće za prethodnu godinu.

(2) Skupština razmatra izvještaj Komisije do kraja septembra odnosno do kraja februara.

(3) Izvještajem se prezentuju ključna pitanja rada Komisije u izvještajnom periodu s informacijama i pokazateljima u pogledu broja prijavi i utvrđenih povreda ustanovljenih Kodeksom, postupaka i mjera koje je Komisija preduzela, o uočenim pozitivnim i/ili negativnim pojavama u primjeni Kodeksa s preporukama, kao i o drugim aktivnostima Komisije.

Član 48
(Izvještaj o primjeni Kodeksa)

- (1) Komisija sačinjava i Skupštini podnosi izvještaj o primjeni ovog kodeksa.
- (2) Izvještaj o primjeni Kodeksa sadrži analizu podataka, informacija i zapažanja Komisije o poštovanju Kodeksa od strane poslanika, adekvatnosti propisanih pravila ponašanja, uticaj edukacija na poboljšanje etičnosti ponašanja kao i preporuke u cilju unapređenja primjene Kodeksa.
- (3) Izvještaj iz stava 1 ovog člana Komisija može podnijeti kao dio izvještaja o svom radu iz člana 47 ovog kodeksa ili kao poseban izvještaj.

X. Prelazne i završne odredbe

Član 49
(Imenovanje Komisije)

- (1) Skupština u roku od 60 dana od dana stupanja na snagu ovog kodeksa, imenuje članove Komisije, u skladu s odredbama ovog kodeksa.
- (2) Do imenovanja Komisije saglasno ovom kodeksu, po prijavama o eventualnom kršenju Kodeksa postupa postojeća Komisija za sprovođenje Kodeksa ponašanja poslanika Skupštine Brčko distrikta Bosne i Hercegovine.

Član 50
(Prestanak važenja)

Stupanjem na snagu ovog kodeksa prestaje da važi Kodeks ponašanja poslanika Skupštine Brčko distrikta BiH broj: 0-02-022-12/08 od 31. januara 2008. godine.

Član 51
(Stupanje na snagu)

Ovaj kodeks stupa na snagu osmog dana od dana objavljivanja u Službenom glasniku Brčko distrikta BiH.

Broj: 01-02-1457/24
Brčko, 14. 3. 2024. godine

PREDSJEDNIK
SKUPŠTINE BRČKO DISTRIKTA BiH
Mr. sci. Siniša Milić